

潘黃門集題詞

余讀潘安仁馬汧督誅惻然思古義
士猶班孟堅之傳蘇子卿也及悼亡
詩賦哀永逝文則又傷其閨房辛苦
有古落葉哀蟬之嘆史云善爲哀誄
誠然哉籍田賦客舍議並以典則見

稱陸海潘江無不善也獨惜其愍懷
詐書呈身牝后屈長卿之典冊行江
充之告變重汗泥以自辱耳閑居一
賦板輿輕軒浮杯高歌天倫樂事足
起愛慕孰知其仕宦情重方思熱客
慈毋拳拳非所念也楊駿被誅綱紀

當坐安仁賴河陽舊客得脫軀命而
好進不休舉家糜滅害由小史生之
者公孫宏殺之者孫秀禍福何常古
人所以畏蜂蠆也二陸屠門戎毒相
類天下哀之遂騰討檄安仁東市獨
無憐者士之賢愚至死益見余深爲

彼美惜焉

婁東張溥題

晉潘黃門集目錄

賦

西征賦

籍田賦

滄海賦

登虎牢山賦

閑居賦

狹室賦

秋興賦

國家圖書館, NATIONAL CENTRAL LIBRARY, TAIWAN, R.O.C.

懷舊賦

悼亡賦

寡婦賦

笙賦

相風賦

又

射雉賦

螢火賦

河陽庭前安石榴賦

有序

蓮花賦

芙蓉賦

橘賦

秋菊賦

表

上關中詩表

議

九品議

上客舍議

頌

許由頌

贊

故太常任府君畫贊

箴

荅摯虞新婚箴

訓

兩階銅人訓

碑

司空鄭袞碑

哀文
荆州刺史東武戴侯楊使君碑

景獻皇后哀策文

哀未逝文

爲楊長文作弟仲武哀祝文

京陸公主女王氏哀辭

陽城劉氏妹哀辭

金鹿哀辭

傷弱子辭

悲邢生辭

爲任子咸妻作孤女澤蘭哀辭

祭文

弔孟嘗君文

爲諸婦祭庾新婦文

哭弟文

誄

世祖武皇帝誄

太宰魯武公誄

有字

楊荊州誄

夏侯常侍誄

馬汧督誄

楊仲武誄

宣城宣君誄

庾尚書誄

南陽長公主誄

皇女誄

賈充誄

詩

關中詩

十六章

爲賈謐作贈陸機

十一章

北芒送別王世胄

家風詩

於賈謐坐講漢書

離合

金谷集作詩

河陽縣作二首

在懷縣作二首

內顧詩二首

悼亡詩二首

哀詩

思子詩

別詩

閣柱謠

附錄

本傳

晉潘黃門集目錄終

潘黃門集卷全

晉 滎陽潘 岳著

明 太倉張 溥閱

賦

、、西征賦

歲次玄枵，月旅蕤賓，丙丁統日，乙未御辰，潘子憑軾西征，自京徂秦，乃喟然而歎曰，古往今來，邈矣悠哉，寥廓忽恍，化一氣而甄三才，此三才者，天地人道，唯生與位，謂之大寶，生有修短之

命位有通塞之遇，鬼神莫之要，聖智弗能豫，當
休明之盛世，今託菲薄之陋質，納旌弓於鉉台，
讚庶績於帝室，嗟鄙夫之常索，今固旣得而患
失，無柳季之直道，佐士師而一黜，武皇忽其升
遐，八音遏於四海，天子寢於諒闇，今百官聽於
冢宰，彼負荷之殊重，今雖伊周，其猶殆，窺七貴
於漢庭，疇一姓之或在，無危明以安位，祗居逼
以示專，陷亂逆以受戮，匪降禍之自天，孔隨時
以行藏，遽與國而舒卷，苟蔽微以謬彰，患過辟

之未遠，悟山潛之逸士，卓長往而不反，陋吾人
之拘攣，飄萍浮而蓬轉，察位偏其隆替，名節濯
以隳落，危素卵之絜殼，甚玄鷲之巢幕，心戰懼
以兢悚，如臨深而履薄，夕獲歸於都外，宵未中
而難作，匪擇木以棲集，鮮林焚而鳥存，遭千載
之嘉會，皇合德於乾坤，弛秋霜之嚴威，流春澤
之渥恩，甄大義以明責，反初服於私門，皇鑒揆
余之忠誠，俄命余以末班，收疲人於西夏，攜老
幼而入關，丘去魯而顧歎，季過沛而涕零，伊故

鄉之可懷。疚聖達之幽情。矧匹夫之安土。邈投身於鎬京。猶犬馬之戀主。竊託慕於闕庭。眷輦洛而淹涕。思纏絲於墳塋。余乃越平樂。過街郵。秣馬臯門。稅駕西周。遠矣姬德。興自高辛。思文后稷。厥初生民。率西水滸。化流岐幽。祚隆昌發。舊邦惟新。旋牧野而歷茲。愈守柔以執競。夜申旦而不寐。憂天保之未定。惟泰山其猶危。祀八百而餘慶。覽亡王之驕淫。竄南巢以投命。坐積薪以待然。方指日而比盛。人度量之乖舛。何相

越之遼迴。考土中於斯邑。成建都而營築。既定鼎于郊廓。遂鑽龜而啓繇。平失道而來遷。繫二國而是祐。豈時王之無僻。賴先哲以長懋。望闕北之兩門。感號鄭之納惠。討子頽之樂禍。尤闕西之效戾。重戮帶以定襄。弘大順以霸世。靈擁川以止鬪。晉演義以獻說。容景悼以迄巧。政凌遲而彌季。俾庶朝之遘逆。歷兩王而干位。踰十葉以逮赧。邦分崩而爲二。竟橫噬於虎口。輸文武之神器。澡孝水而濯纓。嘉善名而在茲。天赤

子於新安。坎路側而瘞之。亭有千秋之號。子無
七旬之期。雖勉勵於延吳。實潛慟乎余慈。眄山
川以懷古。悵攬轡於中塗。虐項氏之肆暴。坑降
卒之無辜。激秦人以歸德。成劉后之來蘇。事洄
沑而好還。卒宗滅而身屠。經澠池而長想。停余
車而不進。秦虎狼之疆國。趙侵弱之餘燼。超入
險而高會。杖命世之英蘭。耻東瑟之偏鼓。提西
缶而接刃。辱十城之虛壽。奄咸陽以取儁。出申
威於河外。何猛氣之咆勃。入屈節於廉公。若四

體之無骨。處智勇之淵偉。方鄙吝之忿悁。雖改
日而易歲。無等級以寄言。當光武之蒙塵。致王
誅於赤眉。異奉辭以伐罪。初垂翅於迴溪。不尤
青以掩德。終奮翼而高揮。建佐命之元勳。振皇
綱而更維。登峭坂之威夷。仰崇嶺之嵯峩。臯託
墳於南陵。文違風於北阿。蹇哭孟以審敗。襄墨
練而授戈。曾隻輪之不反。練三帥以濟河。值庸
主之矜愎。殆肆叔於朝市。任好綽其餘裕。獨引
過以歸已。明三敗而不黜。卒凌晉以雪耻。豈虛

名之可立，良致霸其有以，降曲嶠而憐號，託與國於亡虞，貪誘賂以賣隣，不及臘而就拘，垂棘反於故府，屈產服于晉輿，德不逮而民無援，仲雍之祀忽諸，我徂安陽，言陟陝郛，行乎漫瀆之口，慙乎曹陽之墟，美哉邈乎茲土之舊也，固乃周召之所分，二南之所交，麟趾信於關雎，騶虞應乎鵲巢，慙漢氏之剝亂，朝流亡以離析，卓滔天以大滌，劫宮廟而遷跡，俾萬乘之盛尊，降遙思於征役，顧請旋於催汜，既獲許而中惕，追皇

駕而驟戰，望玉輅而縱鎬，痛百寮之勤王，咸畢力以致死，分身首於鋒刃，洞胸腋以流矢，有褰裳以投岸，或攘袂以赴水，傷桴楫之褊小，撮舟中之掬指，升曲沃而惆悵，惜兆亂而兄替，枝末大而本披，都偶國而禍結，臧札飄其高厲，委曹吳而成節，何莊武之無耻，徒利開而義閉，躡函谷之重阻，看天險之衿帶，跡諸侯之勇怯，筭羸氏之利害，或開關以延敵，競遁逃以奔竄，有噤門而莫啓，不窺兵於山外，連雞互而不棲，小

國合而成大。豈地勢之安危。信人事之否泰。漢
六世而拓畿。縣弘農而遠關。厭紫極之閑敞。其
微行以遊盤。長傲賓於柏谷。妻靚貌而獻食。疇
匹婦其已泰。胡厥夫之謬官。昔明王之巡幸。固
清道而後往。懼術糜之或變。峻徒御以誅賞。彼
白龍之魚服。挂豫且之密網。輕帝重於天下。奚
斯漸之可長。弔戾園於湖邑。諒遭世之巫蠱。探
隱伏於難明。委讒賊之趙虜。加顯戮於儲貳。絕
肌膚而不顧。作歸來之悲臺。徒望思其何補。紛

吾既邁此全節。今又繼之以盤桓。問休牛之故
林。感徵名於桃園。發閔鄉而警策。遡黃巷以濟
潼。眺華岳之陰崖。覲高掌之遺蹤。憶江使之反
壁。告亡期於祖龍。不語怪以徵異。吾聞之於孔
公。愠韓馬之大憝。阻關谷以稱亂。魏武赫以霆
震。奉義辭以伐叛。彼雖衆其焉用。故制勝於廟
筭。碎揚桴以振塵。繕瓦解而冰泮。超遂遁而奔
狄。甲卒化爲京觀。倦狹路之迫隘。軌崎嶇以低
仰。蹈秦郊而始闢。豁爽塏以宏壯。黃壤千里。沃

野彌望，華實紛敷，桑麻條暢，邪界褒斜，右濱沂隴，寶雞前鳴，甘泉後涌，面終南而背雲陽，跨平原而連嶓冢，九嶷截辭，太一巖嵒，吐清風之颺戾，納歸雲之鬱鬱，南有玄灞，素滻，湯井溫谷，北有清渭，濁涇，蘭池周曲，浸決鄭白之渠，漕引淮海之粟，林茂有鄆之竹，山挺藍田之玉，班述陸海珍藏，張叙神臯，隩區此西賓所以言於東主，安處所以聽於憑虛也，可不謂然乎，勁松彰於歲寒，貞臣見於國危，入鄭都而抵掌，義桓友之

忠規，竭股肱於昏主，赴塗炭而不移，世善職於司徒，緇衣敝而改爲履，犬戎之侵地，疾幽后之詭惑，舉僞烽以沮衆，淫嬖褒以縱慝，軍敗戲水之上，身死驪山之北，赫赫宗周，滅爲亡國，又有繼於此者，異哉秦始皇之爲君也，傾天下以厚葬，自開闢而未聞，匠人勞而弗圖，俾生理以報勤，外離西楚之禍，內受牧豎之焚，語曰，行無禮必自及，此非其効歟，乾坤以有親可久，君子以厚德載物，觀夫漢高之興也，非徒聰明神武，豁

達大度而已也。乃實慎終追舊。篤誠款愛。澤靡不漸。恩無不逮。率土且猶弗遺。而况於鄰里乎。而况於卿士乎。于斯時也。乃摹寫舊豐。制造新邑。故社易置。粉榆遷立。街衢如一。庭宇相襲。渾雞大以亂放。各識家而競入。籍舍怒於鴻門。沛局踏而來王。范諶害而弗許。陰授劍以約莊。擗白刃以萬舞。危冬葉之待霜。履虎尾而不噬。寔要伯於子房。樊抗憤以卮酒。咀彘肩以激揚。忽蛇變而龍攄。雄霸上而高驥。曾遷怒而橫撞。碎

玉斗其何傷。嬰胷組於軹塗。投素車而肉袒。疎飲餞於東門。畏極位之盛滿。金墉鬱其萬雉。峻嶮峭以繩直。戾飲馬之陽橋。踐宣平之清閭。都中雜沓。戶千人億。華夷士女。駢闐逼側。展名京之初儀。卽新館而蒞職。勵疲鈍以臨朝。勗自彊而不息。於是孟春受謝。聽覽餘日。巡省農功。周行廬室。街里蕭條。邑居散逸。營宇寺署。肆躡管庫。蕞芮於城隅者。百不一處。所謂尙冠修成。黃棘宣明。建陽昌陰。北煥南平。皆夷漫滌蕩。無其

處而有其名，爾乃階長樂，登未央，汎太液，凌建章，縈馭娑而欵駘盪，欄粉詣而轢承光，徘徊桂宮，惆悵柏梁，驚雉雒於臺陂，狐兔窟於殿傍，何黍苗之離離，而余思之芒芒，洪鐘頓於毀廟，乘風廢而不懸，禁省鞠爲茂草，金狄遷於霸川，懷夫蕭曹魏邴之相，辛李衛霍之將，銜使則蘇屬國，震遠則張博望，教敷而彛倫序，兵舉而皇威暢，臨危而致勇奮，投命而高節亮，暨乎柁侯之忠，孝淳深陸賈之優遊，宴喜長卿淵雲之文子。

長政駿之史，趙張三王之尹，京定國釋之之聽，理汲長孺之正直，鄭當時之推士，終童山東之英妙，賈生洛陽之才，子飛翠綉拖鳴玉以出入，禁門者衆矣，或被髮左衽，奮迅泥滓，或從容傳會，望表知裏，或著顯績而嬰時戮，或有大才而無貴仕，皆揚清風於上列，垂令聞而不已，想珮聲之遺響，若鏗鏘之在耳，當音鳳恭顯之任勢也，乃熏灼四方，震耀都鄙，而死之日，曾不得與夫十餘公之徒隸，齒名才難，不其然乎，望漸臺

潘黃門集 卷全
而扼腕。梟巨猾而餘怒。揖不疑於北闕。軼檣里於武庫。酒池鑿於商辛。追覆車而不寤。曲陽僭於白虎。化奢淫而無度。命有始而必終。孰長生而久視。武雄略其焉在。近惑文成而溺五利。倖造化以制作。窮山海之奧秘。靈若翔於神島。犇鯨浪而失水。曝鱗骼於漫沙。隕明月以雙墜。擢仙掌以承露。干雲漢而上至。致邛菀其奚難。惟余欲而是恣。從逸遊於角觝。絡甲乙以珠翠。忍生人之減半。勒東岳以虛美。超長懷以遐念。若

循環之無賜。較面朝之煥炳。次後庭之猗靡。壯當熊之忠勇。深辭輦之明智。衛鬢髮以光鑒。趙輕體之纖麗。咸善立而聲流。亦寵極而禍侈。津便門以右轉。究吾境之所暨。掩細柳而撫劔。快孝文之命帥。周受命而忘身。明戎政之果毅。距華蓋於壘和。案乘輿之尊轡。肅天威之臨顏。率軍禮以長擡。輕棘霸之兒戲。重條侯之倨貴。索杜郵其焉在。云孝里之前號。惘輟駕而容與。哀武安以興悼。爭伐趙以徇國。定廟筭之勝負。扞

矢言而弗納，反推怨以歸咎。未十里於遷路，尋
賜劔以刎首。嗟主闇而臣疾，禍于何而不有。窺
秦墟於渭城，冀闕緬而堙盡。覓陛殿之餘基，裁
岐岷以隱嶙。想趙使之抱壁，瀏睨楹以抗憤。燕
圖窮而荆發，紛絕袖而自引。筑聲厲而高奮，狙
潛鉛以脫臄。據天位其若茲，亦狼狽而可懲。簡
良人以自輔，謂斯忠而鞅賢。寄苛制於捐灰，矯
扶蘇於朔邊。儒林填於坑穽，詩書煬而爲煙。國
滅亡以斷後，身刑轅以啓前。商法焉得以宿，黃

犬有可復牽，野蒲變而成脯。苑鹿化以爲馬，假
讒賊以天權。鉗衆口而寄坐，兵在頸而顧問。何
爲不早而告我，願黔黎其誰聽。惟請死而獲可，
逮子嬰之果決。敢討賊以舒禍，勢土崩而莫振。
作降王於路左，蕭收圖以相劉。料險易與衆寡，
羽天與而不取。冠沐猴而縱火，貫三光而洞九
泉。曾未足以喻其高下，感市閭之叢井。歎尸韓
之舊處，丞屬號而守闕。人百身以納贖，豈生命
之易投。誠惠愛之洽，著訐望之以求直。亦余心

之所惡。思夫人之政術，實幹時之良具。苟明法以釋憾，不愛才以成務。弘大體以高貴，非所望於蕭傅。造長山而慷慨，偉龍顏之英主。胸中豁其洞開，羣善湊而必舉。存威格乎天區，亡墳掘而莫禦。臨掩坎而索林，步毀垣以延佇。越安陵而無譏，諒惠聲之寂寞。弔爰絲之正議，伏梁劔於東郭。訊景皇於陽丘，爰信讒而矜詐。殞吳嗣於局下，蓋發怒於一搏。成七國之稱亂，翻助逆以誅錯。恨過聽之無討，茲沮善而勸惡。咎孝元

於渭塋，執奄尹以明貶。褒夫君之善行，廢園邑以崇儉。過延門而責成，忠何辜而爲戮。陷社稷之王章，俾幽死而莫鞠。伏淫嬖之凶忍，勦皇統之孕育。張舅氏之奸漸，貽漢宗以傾覆。刺哀主於義域，僭天爵於高安。欲法堯而承禪，永終古而不刊。瞰康園之孤墳，悲平后之專絜。殃厥父之篡逆，蒙漢耻而不雪。激義誠而引決，赴丹熖以明節。投宮火而焦糜，從灰燼而俱滅。驚橫橋而旋軫，歷弊邑之南垂。門磁石而梁木，蘭兮構

阿房之屈，竒疏南山以表闕，倬樊川以激池，役鬼傭其猶否，矧人力之所爲，工徒斲而未息，義兵紛以交馳，宗祧汚而爲沼，豈斯宇之獨隳，由僞新之九廟，誇宗虞而祖黃，驅吁嗟而妖臨，搜佞哀以拜郎，誦六藝以飾奸，焚詩書而面牆，心不則於德義，雖異術而同亡，宗孝宣於樂遊，紹衰緒以中興，不獲事于敬養，盡加隆於園陵，兆惟奉明邑，號千人，訊諸故老，造自帝詢，隱王母之非命，縱聲樂以娛神，雖靡率於舊典，亦觀過

而知仁，憇高望之陽隈，體川陸之污隆，開襟乎清暑之館，遊日乎五柞之宮，交渠引漕，激湍生風，乃有昆明池乎其中，其池則湯湯汗汗，滉滉瀼瀼，浩如河漢，日月麗天，出入乎東西，旦似暘谷，夕類虞淵，昔豫章之名字，披玄流而特起，儀景星以天漢，對牛女以雙峙，圖萬載而不傾，奄摧落於十紀，擢百尋之層觀，今數仞之餘址，振鷺于飛，鳧躍鴻漸，乘雲頡頏，隨流澹淡，灑灑驚波，唼唼菱芡，華蓮爛於綠沼，青蕃蔚乎翠瀨，伊

茲池之肇，穿肆水戰於荒服，志勤遠以極武，良無邀於後福，而菜蔬芣實，水物惟錯，乃有贍乎原陸。在皇代而物土，故毀之而又復，凡厥寮司，旣富而教，咸帥貧惰，同整楫棹，收畧課獲，引繳舉效，鰥夫有室，愁民以樂，徒觀其鼓，施迴輪，灑鉤投網，垂餌出入，挺扠來往，纖經連白，鳴根厲響，貫鰓芎尾，掣三牽兩，於是弛青鯤於網鉅，解頰鯉於黏微，華魴躍鱗，素鱖揚鬐，饗人縷切，鑿刀若飛，應刃落俎，霍霍霏霏，紅鮮紛其初載，賓

旅竦而遲御，旣餐服以屬厭，泊恬靜以無欲，迴小人之腹，爲君子之慮，爾乃端策拂茵，彈冠振衣，徘徊鄧鄩，如渴如饑，心翹勤以仰止，不加敬而自祇，豈三聖之敢夢，竊十亂之或希，經始靈臺，成之不日，惟鄩及豐，仍京其室，庶人子來，神降之吉，積德延祚，莫貳其一，永惟此邦，云誰之識，越可略聞，而難臻其極，子嬴鋤以借父訓，秦法而著色，耕讓畔以閒田，沾姬化而生棘，蘇張喜而詐騁，虞芮愧而訟息，由此觀之，士無常俗，

而教有定式，上之遷下，猶鈞之埏埴，雖五方雜會，風流溷淆，惰農好利，不昏作勞，密邇獫狁，戎馬生郊，而制者必割實存操刀，人之升降，隨政隆替，仗信則莫不用情，無欲則賞之不竊，雖智不能理，明不能察，信此心也。庶免夫戾，如其禮樂，以俟來哲。

籍田賦

伊晉之四年正月丁未，皇帝親率羣后，籍於千畝之甸，禮也。於是乃使甸師清畿，野廬掃路，封

人墼宮，掌舍設楹，青壇蔚其嶽立兮，翠幙黝以雲布，結崇基之靈址兮，啓四塗之廣阡，沃野墳腴，膏壤平砥，清洛濁渠，引流激水，遐阡繩直，邇陌如矢，葱輅服於縹輶兮，紺轅綴於黛耜，儼儲駕於屢左兮，俟萬乘之躬履，百僚先置位以職分，自上下下，具惟命臣，襲春服之萋萋兮，接游車之麟麟，微風生於輕憶兮，纖埃起於朱輪，森奉璋以階列兮，望皇軒而肅震，若湛露之晞朝陽兮，衆星之拱北辰也。於是前驅魚麗，屬車鱗

潘黃門集 卷全
萃閭闔洞起參塗方駟常伯陪乘太僕秉轡后
妃獻種稷之種司農撰播殖之器挈壺掌升降
之節宮正設門閭之蹕天子乃御玉輦蔭華蓋
衝牙錚鎗綃紈綵縠金根照耀以炯晃兮龍驥
騰驤而沛艾表朱玄於離坎飛青縞於震兌中
黃擘以發暉兮方綵紛其繁會五輅鳴鑿九旗
揚旆瓊釵入藥雲罕晻藹簫管嘲啞以啾嘈兮
鼓鞀眩隱以砰磕筍虬嶷以軒翥兮洪鍾越乎
區外震震填填塵鷲連天以幸乎籍田蟬冕頻

以灼灼兮碧色肅其芊芊似夜光之剖荆璞兮
若茂松之依山巔也於是我皇乃降靈壇撫御
耦游場染屨洪縻在手三推而舍庶人終畝貴
賤以班或五或九于斯時也居靡都鄙民無華
裔長幼雜選以交集士女頌斌而咸戾被褐振
裾垂髻總髻躡踵側肩倚裳連袂黃塵爲之四
合兮陽光爲之潛翳動容發音而觀者莫不抃
舞乎康衢謳吟乎聖世情欣樂乎昏作兮慮盡
力乎樹藝靡推督而常勤兮莫之課而自勵躬

先勞以悅使兮，豈嚴刑而猛制哉？有邑老田父，或進而稱曰：蓋損益隨時，理有常然。高以下爲基，民以食爲天。正其末者，端其本；善其後者，慎其先。夫九土之宜，弗任；四人之務，不一。野有菜蔬之色，朝靡代耕之秩。無儲穡以虞災，徒望歲以自畢。三季之衰，皆此物也。今聖上昧旦丕顯，夕惕若慄，圖墮於豐，防儉於逸。欽哉！欽哉！惟穀之恤，展三時之弘務。致倉廩於盈溢，固堯湯之用心。而存救之要術也。若乃廟祧有事，祝宗諏

日。簋簠普淖，則此之自實。縮鬯蕭茅，又於是乎出。黍稷馨香，旨酒嘉粟，宜其民和年登，而神降之吉也。古人有言曰：聖人之德，無以加於孝乎？夫孝者，天地之性，人之所由靈也。昔者明王以孝理天下，其或繼之者，鮮哉！希矣！逮我皇晉，實光斯道。儀刑孚於萬國，愛敬盡於祖考。故躬稼以供粢盛，所以致孝也。勸稼以足百姓，所以固本也。能本而孝，盛德大業至矣哉！此一役也，而二美具焉。不亦遠乎？不亦重乎？敢作頌曰：思樂

旬畿薄採其茅，大君戾止，言藉其農。其農三推，萬方以祗，耨我公田，實及我私。我簠斯盛，我簋斯粢。我倉如陵，我庾如坻。念茲在茲，永言孝思。民力普存，祝史正辭。神祇攸歆，逸豫無期。一人有慶，兆民賴之。

滄海賦

徒觀其狀也，則湯湯蕩蕩，瀾漫形沈，流沫千里，懸水萬丈。測之莫量其深，望之不見其廣。無遠不集，靡幽不通。群谿俱息，萬流來同。舍三河而

納四瀆，朝五湖而夕九江。陰霖則興雲降雨，陽霽則吐霞曜日。煮水而鹽成，剖蚌而珠出。其中有蓬萊名嶽，青丘奇山。阜陵別島，嶶環其間。其山則螺崔嵬，翠嵯峩降屈。披滄流以特起，擢崇基而秀出。其魚則有吞舟鯨鯢，鰓鰓龍鬚。蜂目豺口，狸斑雉軀。恠體異名，不可勝圖。其蟲獸則素蛟丹虬，元龜靈鼉。脩鼈巨鼈，紫貝螭虵。玄螭蚴虬，赤龍焚蘊。遷體改角，推舊納新。舉扶搖以抗翼，泛陽侯以濯鱗。其禽鳥則鷗鴻鸕鶿，鴛鴦

潘黃門集 卷全
鷓鴣朱背煒燁，縹翠葱青，詳察波浪之來往，遍聽奔激之音響，力勢之所迴薄，潤澤之所彌廣，信普天之極大，橫率土而莫兩。

登虎牢山賦

辭京輦兮遙邁，將遠遊兮東夏，朝發軔兮帝墟，夕結軌兮中野，憑脩坂兮停車，臨寒泉兮飲馬，眷故鄉之遼隔，思紆軫以鬱陶，步玉趾以升降，凌汜水兮登虎牢，覽河洛之二川，眺成平之雙阜，崇嶺羈以崔翠，幽谷豁以窅窅，路透迤以迫

隘，林廓落以蕭條，爾乃仰蔭嘉木，俯藉芳卉，青烟鬱其相望，棟宇凜以鱗萃，彼登山而臨水，固先喆之所哀，矧去鄉而離家，邈長辭而遠乖，望歸雲以歎息，腸一日而九迴，良勞者之詠事，爰寄言以表懷。

閑居賦

岳嘗讀汲黯傳，至司馬安，四至九卿，而良史題之以巧宦之目，未嘗不慨然廢書而歎曰：嗟乎，巧誠有之，拙亦宜然，顧常以爲士之生也，非至

潘黃門集 卷全
聖無軌，微妙玄通者，則必立功立事，効當年之用，是以資忠履信，以進德脩辭，立誠以居業。僕少竊鄉曲之譽，忝司空太尉之命，所奉之主，卽太尉曾武公，其人也。舉秀才爲郎，遠事世祖。武皇帝爲河陽懷令，尚書郎，廷尉平。今天子諒闇之際，領太傅主簿，府主誅，除名爲民。俄而復官，除長安令，遷博士，未召拜親疾，輒去官。閱自弱冠，涉乎知命之年，入徙官，而一進階，再免一除，各一不拜職，遷者三而已矣。雖通塞有遇，抑亦

拙者之效也。昔通人和長輿之論，余也。固謂拙於用多。稱多則吾豈敢。言拙信而有徵。方今俊乂在官，百工惟時，拙者可以絕意乎寵榮之事矣。太夫人在堂，有羸老之疾，尚何能違膝下色養而屑屑從斗筭之役乎。於是覽止足之分，庶浮雲之志，築室種樹，逍遙自得，池沼足以漁釣，春稅足以代耕，灌園鬻蔬，以供朝夕之膳，牧羊酤酪，以俟伏臘之費。孝乎，惟孝友於兄弟，此亦拙者之爲政也。乃作閑居之賦，以歌事遂情焉。

潘黃門集 卷全
其辭曰

傲墳素之長圃，步先哲之高衢。雖吾顏之云厚，猶內愧於甯濼。有道吾不仕，無道吾不愚。何巧智之不足，而拙艱之有餘也。於是退而閑居，于洛之埃，身齊逸民，名綴下士。陪京泝伊，面郊後市。浮梁黜以徑度，靈臺傑其高峙。窺天文之秘奧，究人事之終始。其西則有元戎禁營，玄幙綠徽。谿子巨黍，異秦同機。礮石雷駭，激矢蚩飛。以先啓行，曜我皇威。其東則有明堂辟雍，清穆敞

閑環林縈映，圓海廻淵。聿追孝以嚴父，宗文考以配天。祇聖敬以明順，養更老以崇年。若乃背冬涉春，陰謝陽施。天子有事於柴燎，以郊祖而展義。張鈞天之廣樂，備千乘之萬騎。服振振以齊玄，管啾啾而並吹。煌煌乎隱隱乎，茲禮容之壯觀。而王制之巨麗也。兩學齊列，雙宇如一。右延國胄，左納良逸。祈祈生徒，濟濟儒術。或升之堂，或入之室。教無常師，道在則是。故髦士投綬，名王懷璽。訓若風行，應如草靡。此里仁所以爲

美孟母所以三徙也。爰定我居，築室穿池，長楊
映沼，芳枳樹籬，遊鱗灑潏，菡萏敷披，竹木蓊藹，
靈果參差，張公大谷之梨，梁侯烏桺之柿，周文
蘇枝之棗，房陵朱仲之李，靡不畢殖，三桃表櫻，
胡之別二柰，曜丹白之色，石榴蒲萄之珍，磊落
蔓衍乎其側，梅杏郁棣之屬，繁榮麗藻之飾，華
實照爛，言所不能極也。菜則葱韭蒜芋，青筍紫
薑，葦薺甘旨，蓼萋芬芳，蘘荷依陰，時藿向陽，綠
葵含露，白薤負霜，於是凜秋暑退，熙春寒往，微

雨新晴，六合清朗，太夫人乃御板輿，升輕軒，遠
覽王畿，近周家園，體以行和，藥以勞宣，常膳載
加，舊痾有痊，席長筵列，孫子柳垂陰，車結軌，陸
摘紫房，水挂頰鯉，或宴於林，或楔于汜，昆弟斑
白，兒童稚齒，稱萬壽以獻觴，咸一懼而一喜，壽
觴舉，慈顏和，浮杯樂飲，絲竹駢羅，頓足起舞，抗
音高歌，人生安樂，孰知其他，退求已而自省，信
用薄而才劣，奉周任之格言，敢陳力而就列，幾
陋身之不保，尚奚擬於明哲，仰衆妙而絕思，終

優游以養拙。

狹室賦

歷甲第以遊觀，旋陋巷而言歸。伊余館之褊狹，良窮弊而極微。閤寥戾以互掩，門崎嶇而外扉。室側戶以攢楹，檐接柜而交榱。當視融之御節，熾朱明之隆暑。沸體怒其如鑠，珠汗揮其如雨。若乃重陰晦冥，天威震曜。漢潦沸騰，叢溜奔激。白竈爲之沉溺，器用爲之浮漂。彼處貧而不怨，嗟生民之攸難。匪廣廈之足榮，有切身之近患。青陽萌而畏暑，白藏兆而懼寒。獨味道而不悶，喟然向其時歎。

秋興賦

晉十有四年，余春秋三十有二。始見二毛，以太尉掾兼虎賁中郎將，寓直于散騎之省。高閣連雲，陽景罕曜。珥蟬冕而襲紈綺之士，此焉遊處。僕野人也，偃息不過茅屋茂林之下，談話不過農夫田父之客。攝官承乏，猥廁朝列。夙興晏寢，匪遑底寧。譬猶池魚籠鳥，而有江湖山藪之思。

於是染翰操紙慨然而賦于時秋也故以秋興
命篇其辭曰

四運忽其代序兮萬物紛以廻薄覽花蔣之時
育兮察盛衰之所託感冬索而春敷嗟夏茂而
秋落雖末事之榮悴兮伊人情之美惡善乎宋
生之言曰悲哉秋之爲氣蕭瑟兮草木搖落而
變衰慘慄兮若在遠行登山臨水送將歸夫送
歸懷慕徒之戀兮遠行有羈旅之憤臨川感流
以歎逝兮登山懷遠以悼近彼四感之疚心兮

遭一塗其難忍嗟秋日之可哀兮良無愁而不
盡野有歸鷺隰有翔隼游氛朝興槁葉夕殞於
岑乃屏輕箑釋纖絺藉莞蒹御袷衣庭樹撼以
灑落勁風戾而吹帷蟬嘒嘒以寒吟雁飄飄而
南飛天晃朗以彌高日悠陽而浸微何微陽之
短晷覺涼夜之方永月朧朧以含光兮露淒清
以凝冷熠燿粲於階闥兮蟋蟀鳴乎軒屏聽離
鴻之晨吟望流火之餘景宵耿介而不寐兮獨
展轉於華省悟時歲之適盡兮慨俛首而自省

斑鬢彪以承弁兮，素髮颯以垂領。仰羣儁之逸軌兮，攀雲漢以遊騁。登春臺之熙熙，珥金貂之炯炯。苟趣捨之殊途兮，庸詎識其躁靜。聞至人之休風兮，齊天地於一指。彼知安而忘危兮，固出生而入歿。行投趾於容跡兮，殆不踐而獲底。闕側足以及泉兮，雖猴猿而不履。龜祀骨於宗祧兮，思反身於綠水。且歛衽以歸來兮，忽投紱以高厲。耕東臬之沃壤兮，輸黍稷之餘稅。泉涌湍於石間兮，菊揚芳乎崖澗。秋水之涓涓兮，玩游鯈之漵漵。逍遙乎山川之阿，放曠乎人間之世。優哉游哉，聊以卒歲。

懷舊賦

余十二而獲見於父友東武戴侯楊君，始見知名，遂申之以婚姻。而道元公嗣亦隆世親之愛，不幸短命，父子凋殞。余既有私艱，且尋役於外，不歷嵩丘之山者九年于茲矣。今而經焉，慨然懷舊，乃作賦曰：

啓開陽而朝邁，濟清洛以徑度。晨風淒以激冷，

夕雪暘以掩路，轍含冰以滅軌。水漸軻以凝沍，塗艱屯其難進。日晡晚而將暮，仰晞歸雲俯鏡。泉流前瞻太室，傷眺嵩丘。東武托焉，建塋啓疇。巖巖雙表，列列行楸。望彼楸矣，感于予思。旣興慕於戴侯，亦悼元而哀嗣。墳纍纍以接隴，栢森森以攢植。何逝沒之相尋，曾舊草之未異。余總角而獲見，承戴侯之清塵。名余以國士，眷余以嘉姻。自祖考而隆好，逮二子而世親。歡携手以偕老，庶報德之有隣。今九載而一來，五臣作來歸空

館聞其無人，陳芟被於堂除。舊圃化而爲薪，步庭廡以徘徊。涕泫流而霑巾，宵展轉而不寐。驟長嘆以達晨，獨鬱結其誰語。聊綴思於斯文，

悼亡賦

伊良嬪之初降，幾二紀以迄茲。遭兩門之不造，備荼毒而嘗之。嬰生艱之至極，又薄命而早終。含芬華之芳烈，翩零落而從風。神飄忽而不反，形安得而久安。襲時服於遺質，表鉛華於餘顏。問筮賓之何期，宵過今而參闌。詎幾時而見之，

日眷戀以相屬、聽轍人之唱籌、來聲叫以連續、
聞冬夜之恒長、何此夕之一促、且伉儷之片合、
垂明哲乎嘉禮、苟此義之不謬、乃全身之半體、
吾聞喪禮之在妻、謂制重而哀輕、既履冰而知
寒、吾今信其緣情、夕既昏兮朝既清、延爾族兮
臨後庭、入空室兮望靈座、帷飄飄兮燈熒熒、燈
熒熒兮如故、帷飄飄兮若存、物未改兮人已化、
饋生塵兮酒停樽、春風兮泮冰、初陽兮戒溫、逝
逍遙兮浸遠、嗟煢煢兮孤魂、

寡婦賦

樂安任子咸有韜世之量、與余少而歡焉、雖兄
弟之愛、無以加也、不幸弱冠而終、良友既沒、何
痛如之、其妻又吾姨也、少喪父母、適人、而所天
又殞、孤女藐焉、始孩、斯亦生民之至難、而荼毒
之極哀也、管阮瑀既沒、魏文悼之、竝命知舊作
寡婦之賦、余遂擬之、以作敘其孤寡之心焉、其
辭曰、

嗟余生之不造兮、哀天難之匪忱、少伶俜而偏

潘黃門集 卷之三
孤兮痛切，但以摧心。覽寒泉之遺歎兮，詠蓼莪之餘音。情長感以永慕兮，思彌遠而逾深。伊女子之有行兮，爰奉嬪於高族。承慶雲之光覆兮，何君子之惠渥。顧葛藟之蔓延兮，託微莖於樛木。懼身微而施重兮，若履冰而臨谷。遵義方之明訓兮，憲女史之典戒。奉蒸嘗以效順兮，供灑掃以彌載。彼詩人之攸歎兮，徒願言而心悔。何遭命之奇薄兮，遘天禍之未悔。榮華燁其始茂兮，良人忽以捐背。靜闔門以窮居兮，塊煢獨而

靡依。易錦茵以苦席兮，代羅幃以素帷。命阿保而就列兮，覽巾箠以舒悲。口嗚咽以失聲兮，淚橫迸而霑衣。愁煩寃其誰告兮，提孤孩於坐側。時曖曖以向昏兮，日杳杳以西匿。雀羣飛而赴楹兮，雞登樓而歛翼。歸空館而自憐兮，撫衾裯而嘆息。思纏綿以脊亂兮，心摧傷以愴惻。曜靈曄而遄邁兮，四節運而推移。天凝露以降霜兮，木葉落而隕枝。仰神宇之寥寥兮，瞻靈衣之披披。退幽悲於堂隅兮，進獨拜於牀垂。耳傾想於

疇昔兮目彷彿乎平素，雖冥冥而罔覲兮，猶依
依以憑附，痛存亡之殊制兮，將遷神而安厝，龍
轡儼其星駕兮，飛旒翩以啓路，輪按軌以徐進
兮，馬悲鳴而跼顧，潛靈邈其不反兮，殷憂結而
靡訴，晞形影於几筵兮，馳精爽於丘墓，自仲秋
而在疚兮，踰履霜以踐冰，雪靡靡而驟落兮，風
瀏瀏而夙興，雷泠泠而夜下兮，水五臣作水非濼濼
以微凝，意惚恍以遷越兮，神一夕而九升，庶浸
遠而哀降兮，情惻惻而彌甚，願假夢以通靈兮，

目炯炯而不寢，夜漫漫以悠悠兮，寒淒淒以凜
凜，氣憤薄而乘胸兮，涕交橫而流枕，亡魂逝而
永遠兮，時歲忽其適盡，容貌儻以頓頓兮，左右
淒其相慙，感三良之殉秦兮，甘捐生而自引，鞠
稚子於懷抱兮，嗟低徊而不忍，獨指景而心誓
兮，雖形存而志殞，重曰，仰皇穹兮，嘆息，私自憐
兮，何極，省微身兮，孤弱，顧稚子兮，未識，如涉川
兮，無梁，若凌虛兮，失翼，上瞻兮，遺像，下臨兮，泉
壤，窈冥兮，潛翳，心存兮，目想，奉靈坐兮，肅清，愬

空宇兮曠朗，廓孤立兮顧影。塊獨言兮聽響，顧影兮傷摧。聽響兮增哀，遙逝兮逾遠。緬邈兮長乖，四節流兮忽代序。歲云暮兮日西頽，霜被庭兮風入室。夜旣分兮星漢迴，夢良人兮來遊。若聞闔兮洞開，怛驚悟兮無聞。超愴怳兮慟懷，慟懷兮奈何。言陟兮山阿，墓門兮肅肅。脩隴兮峩峩，孤鳥嚶嚶兮悲鳴。長松萋萋兮振柯，哀鬱結兮交集。淚橫流兮滂沱，蹈恭姜兮明誓。詠栢舟兮清歌，終歸骨兮山足。存憑託兮餘華，要吾君兮同穴之死矢兮靡他。

笙賦

河汾之寶有曲沃之懸匏焉，鄒魯之珍有汶陽之孤篠焉。若乃緜蔓紛敷之麗，浸潤靈液之滋。隅隈夷險之勢，禽鳥翔集之嬉。固衆作者之所詳，余可得而略之也。徒視其制器也，則審洪纖面短長，削生籥，裁熟簧，設宮分羽，經徵列商。泄之反謚，厭焉乃揚。管攢羅而表列，音要妙而含清。各守一以司應，統大魁以爲笙。基黃鍾以舉

韻望儀鳳以擢形，寫皇翼以插羽。摹鸞音以厲聲，如鳥斯企。翾翾岐岐，明珠在味。若銜若垂，脩搗內辟。餘簫外透，駢田獵擺。鯽鮓參差，於是乃有。始秦終約，前榮後悴。激憤於今，賤永懷乎故。貴衆滿堂而飲酒，獨向隅而掩淚。援鳴笙而將吹，先嗚噓以理氣。初雍容以安暇，中佛鬱以佛憫。終鬼峩以蹇諤，又颯選而繁沸。罔浪孟以惆悵，若欲絕而復肆。慟傲糴以奔邀，似將放而中匱。愀愴惻減，虺韓煜熠。汎淫汜豔，雪燁岌岌。或

案衍夷靡，或竦勇剽急。或既往不反，或已出復入。徘徊布濩，渙衍葦蕞。舞旣蹈而中輟，節將撫而不入。樂聲發而盡室歎，悲音奏而列坐泣。搗纖翻以震幽簧，越上箏而通下管。應吹喙以往來，隨抑揚以虛滿。勃慷慨以穆亮，顧躊躇以舒緩。輟張女之哀彈，流廣陵之名散。詠園桃之夭天，歌棗下之纂纂。歌曰：棗下纂纂，朱實離離。宛其歿矣，化爲枯枝。人生不能以行樂，死何以虛謚。爲爾乃引飛龍，鳴鴟雞。雙鴻翔，白鶴飛。子喬

輕舉明君懷歸，荆王喟其長吟，楚妃歎而增悲。夫其悽唳辛酸，嚶嚶關關，若離鴻之鳴子也。含嘲譁諧，雍雍喈喈，若羣雛之從母也。郁將劫悟，泓宏融裔，哇咬嘲啞，壹何察慧，訣厲情切。又何磬折，若夫時陽初暖，臨川送離，酒酣徒擾，樂闋日移，疎客始闌，主人微疲，弛絃韜籥，徹塤屏箎，爾乃促中筵，携友生，解嚴顏，擢幽情，披黃苞以授甘，傾縹瓷以酌醺，光妓儼其階列，雙鳳嘈以和鳴，晉野悚而投琴，况齊瑟與秦箏，新聲變曲。

奇韻橫逸，縈纏歌鼓，網羅鐘律，爛熳燭燭，以放豔鬱，蓬勃以氣出，秋風詠於燕路，天光重於朝日，大不踰宮，細不過羽，唱發章夏，導揚韶武，協和陳宋，混一齊楚，邇不逼而遠無攜，聲成文而節有叙，彼政有失得，而化以醇薄，樂所以移風於善，亦所以易俗於惡，故絲竹之器未改，而桑濮之流已作，惟簧也能研羣聲之清，惟笙也能總衆清之林，衛無所措其邪，鄭無所容其淫，非天下之和樂，不易之德音，其孰能與於此乎。

相風賦

混元恍其初判，二氣變而無窮，動靡微而不兆，象有始而必終，思先天而不違，立成器以相風，棲靈鳥於帝庭，似月離乎紫宮，飛輕羽於竿杪，若鸞翔乎雲中，廣莫興而習坎，景風發而遡離，闐闐揚而曲指，明庶起而東移。

又

採脩竹于層城，歷寒暑而靡凋，踞神獸於下趾，棲靈鳥于上標。

射雉賦序

涉青林以游覽兮，樂羽族之羣飛，聿采毛之英麗兮，有五色之名翬，厲耿介之專心兮，參雄豔之姘姿，巡丘陵以經略兮，畫墳衍而分畿，於是青陽告謝，朱明肇授，靡木不滋，無草不茂，初莖蔚其耀新，陳柯滅以改舊，天泱泱以垂雲，泉涓涓而吐溜，麥漸漸以擢芒，雉鷺鷺而朝雊，眇箱籠以揭驕，睨驍媒之變態，奮勁骹以角搓，隣悍目以旁睽，鶯綺翼而頰搥，灼繡頸而袞背，鬱軒

蕭以餘怒，思長鳴以效能。爾乃牽場拄翳，停僮
葱翠，綠栢參差，文翮鱗次，蕭森繁茂，婉轉輕利，
衷料戾以徹鑿，表厭躡以密緻，恐吾游之晏起，
慮原禽之罕至，甘疲心於企想，分倦目以寓視，
何調翰之喬桀，邈疇類而殊才，候扇舉而清叫，
野聞聲而應媒，塞微呂已長眺，已踉蹌而徐來，
摘朱冠之超赫，敷藻翰之陪颺，首葍綠素，身拖
黼繪，青鞵莎靡，丹臆蘭綵，或蹶或啄，時行時止，
班尾揚翹，雙角特起，良遊哢啞，引之規裏，應叱

愕立，擢身竦峙，捧黃間以密毅，屬剛挂以潛擬，
倒禽紛以迸落，機聲振而未已，山鷲悍害，森迅
已甚，越壑凌岑，飛鳴薄廩，鯨牙低鏃，心平望審，
毛體摧落，霍若碎錦，逸羣之儁，擅場挾兩，櫟雌
如異，倏來忽往，忌上風之餐切，畏映日之儻朗，
屏發布而累息，徒心煩而伎憊，伊義鳥之應敵，
啾撲地以厲響，彼聆音而逕進，忽交距以接壤，
彤盈窻以美發，紛首頽而臆仰，或乃崇墳夷靡，
農不易壠，稊菽叢糝，翳蒼葦茸，鳴雄振羽，依于

其冢捫降丘以馳敵雖形隱而草動瞻挺穉之
傾掉意恣躍以振踊嗽出苗以入場愈情駭而
神悚望厲合而醫品雉挾肩而旋踵愀余志之
精銳擬青巖而點項亦有目不步體邪眺旁剔
靡聞而驚無見自鷺周環迴復繚繞盤辟戾翳
旋把縈隨所歷不于中輟馥焉中鏑前剝重膺
傍截疊翮若夫多疑少決膽劣心狷內無固守
出不交戰來若處子去如激電闕問薊葉幘歷
乍見於是計分銖商遠邇揆懸刃騁絕伎如轆

如軒不高不墀當味值胸裂膝破背夷險殊地
馴麤異變晏不暇食夕不告勸昔賈氏之如臯
如解顏於一箭醜夫爲之改貌憾妻爲之釋怨
彼遊田之致獲咸乘危以馳驚何斯藝之安逸
嗟禽從其已豫清道而行擇地而住尾節鑣而
在服肉登俎而永御豈唯皂隸此焉君舉若乃
耽盤流遁放心不移忘其身恤司其雄雌樂而
無節端操或虧此則老氏之所誠而君子之所
不爲

螢火賦

喜熠燿之炳將，與衆類乎超殊。東山感而增嘆，行士慨而懷憂。翔太陰之玄昧，抱夜光以清遊。頰若飛電之宵逝，嘒似移星之雲流。動集陽暉，灼如隋珠。熠燿熒熒，若丹英之照葩。飄飄頻頻，若流金之在沙。載飛載止，光色孔嘉。無聲無臭，明影暢遐。軟朝霞於曠野，庇一葉之垂柯。無干欲於萬物，豈顧恤于緇蘿。至夫重陰之夕，風雨晦暝。萬物眩惑，翩翩獨征。奇姿燎朗，在陰益榮。猶賢哲之處時，時昏昧而道明。若蘭香之在幽，越群臭而彌馨。隨陰陽以飄飄，非飲食之是營。問螽斯之無忌，希夷惠之清貞。羨微虫之琦瑋，援彩筆以爲銘。

河陽庭前安石榴賦

有序

石榴者，天下之奇樹，九州之名果也。是以屬文之士，叙而賦之。

仰天路而高睇，顧隣國以相望。位莫微於宰邑，館莫陋于河陽。雖小縣陋館，可以遨遊。實有嘉

清黃門集 卷全
木曰安石榴，脩條外暢，榮幹內樛，扶疎偃蹇，冉弱紛柔，於是暮春告謝，朱夏戒初，新莖擢潤，膏葉垂腴，曾華曄以先越，含榮鵬其方敷，丹暉綴於朱房，細的點乎紅鬚，煌煌煒煒，熠爚委累，似琉璃之棲鄧林，若珊瑚之映綠水，光明燐爛，含丹耀紫，味滋芳神，色麗瓊藥，遙而望之，煥若隋珠擢重淵，詳而察之，灼若列星出雲間，千房同模，千子如一，御渴療饑，解醒止疾，旣乃攢乎狹庭，載阨載褊，土階無等，肩牆惟淺，壁衣蒼苔，瓦

被駁，蘚處悴而榮，在幽彌顯，其華可玩，其實可珍，羞于王公，薦于鬼神，豈伊仄陋，用渝厥貞，菓猶如之，而况於人。

蓮花賦

偉玄澤之普衍，嘉植物之並敷，遊莫美于春臺，華莫盛于芙蕖，於是惠風動，冲氣和，眄清池，翫蓮花，舒綠葉，挺纖阿，結綠房，列紅葩，仰含清液，俯濯素波，修柯婀娜，柔莖苒弱，流風徐轉，迴波微激，其望之也，曄若皦日燭崑山，其卽之也，晃

若盈尺映藍田

芙蓉賦

陰蘭池之豐沼，育沃野之上腴。課衆榮而比觀，煥卓犖而獨殊。押臍雲布，宙咤星羅。光擬燭龍，色奪朝霞。丹輝拂紅，飛鬚垂的。斐披絕赫，散煥熠爚。流芬賦采，風靡雲旋。布濩磊落，蔓衍天閑。發清陽而增媚，潤白玉而加鮮。

橘賦

余齋前橘樹，冬夏再熟，聊爲賦云爾。

嗟嘉卉之芬華，信氛氲而芬馥。旣蓊茸而萎蕤，且參差而櫛蠹。已鬱鬱而冬茂，亦離離而夏熟。至如廣命賓客，歷覽遊觀。三清旣設，百味星爛。炫焜乎玉案，照曜於金盤。故成都美其家園，江陵重其千樹。旣見稱於陸言，亦標名乎馬賦。

秋菊賦

垂采煒於芙蓉，流芳越乎蘭林。遊女望榮而巧笑，鷓雛遙集而弄音。若乃真人採其實，王母接其葩。或克虛而養氣，或增妖而揚娥。旣延期以

永壽又蠲疾而拜病。

表

上關中詩表

詔臣作關中詩，輒奉詔竭愚，作詩一篇，案漢記孝明時，護羌校尉竇林上降羌顛岸，以爲羌豪，岸兄顛吾復降，問事狀，林對前後兩屈，坐誣罔下獄，歿齊萬年，編戶隸屬，爲日久矣，而歿生異辭，必有詭謬，故引證喻，以懲不恪。

書

詐作愍懷太子書

陛下宜自了，不自了，吾當入了之，中宮又宜速自了，不自了，吾當手了之，并謝妃共要尅期而兩發，勿疑猶豫，致後患，茹毛飲血於三辰之下，皇天許當掃除患害，立道文爲王，蔣爲內主，願成當三牲祠北君，大赦天下，要疏如律令。

議

九品議

天生烝民而樹之君使司牧之勿失其性君不獨治於是乎建牧立監陳其輔佐故曰天工人其代之然則高官厚祿非明崇賢所以興治卑位下役非爲鄙愚所以供職雖或開榮辱之門有爭競之弊而百王莫之能易者此道不可以二故也方今天下隆平四海攸同薦賢達善各以類進夫觀民宣化爲治之本雖實小邑猶須

其人又中正之身。優劣懸殊。苟知人者。智則不知者。謬矣。莫如達官各舉其屬。方獄九列。朝所取信。郡守雖輕。有刺史存。舉之當否。實司其事。考績累名。施黜陟焉。進賢受賞。不進賢甘戮。沮勸既明。則人自爲謀。庶公道大行。而私謁息矣。

上客舍議

謹按逆旅久矣。其所由來。行者賴以頓止。居者薄收其直。交易貿遷。各得其所。官無役賦。因人成利。惠加百姓。而公無末費。語曰。許由辭帝堯。

之命。而舍於逆旅。春秋外傳曰。晉陽處父遇甯戚於逆旅。魏武皇帝亦以爲宜。其詩曰。逆旅整設。以通商賈。然則自堯到今。未有不得客舍之法。唯商鞅尤之。此固非聖世所言也。乃今四海會同。九服納貢。八方翼翼。公私滿路。近畿輻輳。客舍亦稠。冬有溫廬。夏有涼蔭。芻秣成行。器用取給。疲牛必投。乘涼近進。發楅寫鞍。皆有所聒。又諸刦盜。皆起於迥絕。而止乎人衆。十里蕭條。則奸軌生心。連陌接館。則寇情震懾。且聞聲有

救已發有追不救有罪不追有戮禁暴捕亡恒
有司存凡此皆客舍之益而官攤之所乏也又
行者貪路告糴炊爨皆以昏晨盛夏晝熱又兼
星夜旣限早閉不及攤門或避晚關逆逐路隅
祇是慢藏誨盜之原苟以客舍多敗法教官守
棘攤獨復何人彼河橋孟津解券輸錢高第賢
察數入校出品郎兩岸相檢猶懼或失之故懸
以祿利許以功報今賤吏疲人獨專攤稅管開
閉之權藉不校之勢此道路之蠹奸利所殖也

率歷代之舊俗獲行留之懽心使客舍灑掃以
待征旅擇家而息豈非衆庶顛顛之望

頌

許由頌

邈哉許公，執真履貞，辭堯天下，抱樸隱形。川停岳峙，澹泊無營。棲遲高山，與世靡爭。虛薄忝任，來宰斯城。愧無惠化，豹產之政。峩峩治所，樂慕景名。登基逍遙，來過墓庭。逼於時憲，傾筐不盈。恨無青酒，奠公之靈。死而不朽，公其有榮。聊述雅美，揚公馨聲。

贊

故太常任府君畫贊

堂堂我君，鑒象開慶。逸德宣猷，含真履素。味道
無悶，守終純固。弓輿爰集，撫翼清舉。翰飛公庭，
龍升天路。初長方國，流化千里。遂管秘籍，辨章
舊史。入登常伯，出作卿士。外內惟允，庶績咸理。
中節日新，令聞不已。濟濟儒林，翼翼國子。

箴

荅摯虞新婚箴

先王制禮。隨時爲正。俯從企及。豈乖物性。女無
二歸。男有再聘。女實存色。男實存德。德在居正。
色在不惑。新舊兼弘。義申理得。然性情之際。誠
難處心。君子過慮。爰獻明箴。防微測顯。文麗旨
深。敬納嘉誨。敢酬德音。

訓

兩階銅人訓

言之有臧託乎多士言之不臧絕之由已無曰
莫傳宣于四海無曰莫聞響振萬里樞機之發
榮辱之徵怨豈在大纖介是與

碑

司空鄭衮碑

陳謨台階，翼和鼎實，顯績成於臺省，清風暢於
所蒞，故能老安少懷，遠至邇親，凡厥縉紳之士，
所以挹酌洪流，含咀英芳者，猶旱苗之仰膏雨，
湛露之晞朝陽也。銘曰

於鑠元侯，則天垂象，弘操嶽峻，宇量深廣，允恭
克讓，宣哲清明，有始有卒，可大可久，言由忠信，
行履孝友，光光金貂，再冠其首，赫赫皇符，仍折

其部義格皇穹，德冠群后，清風顯烈，沒而不朽。

荊州刺史東武戴侯楊使君碑

肇字季初，滎陽人，封東武伯。薨，謚曰戴君。誕保靈和，繼期載德，宣哲清朗，直道高尚。若乃嘉號推賢，博愛濟衆，邦黨服其義，而縉紳慕其風。于時文后曆數在躬，相國幕府實允華夏。九德咸事，俊又在官，成君名器，納字參軍。宏略被於南國，美化行乎江漢。西陵之役，懸軍深入，親薄寇壘，躬行天誅。旣而救兵不進，糧盡道窮，因乃憮然迴慮，歿其衆而返。雖爲法受黜，勳庸未崇，而天下伏其勇，世主思其忠。

哀文

景獻皇后哀策文

於穆先后，儷皇協運。世宗之胤，德博化光。用儉禮峻，任姒隆周。后亦母晉，終溫且惠。其儀淑慎，既慎其儀。克明禮教，撫翼齊藩。訓成弘操，其慈有威。不舒不暴，乃家乃邦。是則是效，嗟余艱屯。仍遭不造，靡恃惟妣。景命弗保，心之云痛。痛貫穹昊，襲龜筮之良辰。啓幽房之潛隧，整武駕之隆牡。結龍輶之縞駟，望旂常而崩摧。披輻輳以

增歛口嗚咽以失聲目橫迸以灑淚邈兩絕於
宮闈長無覲於彷彿

哀未逝文

啓父兮宵興悲絕緒兮莫承俄龍輻兮門側嗟
俟時兮將升嫂姪兮悼惶慈姑兮垂矜聞鳴雞
兮戒朝咸驚號兮撫膺逝日長兮生年淺憂患
衆兮歡樂鮮彼遙思兮離居歎河廣兮宋遠今
柰何兮一舉邈終天兮不反盡余哀兮祖之晨
揚明燎兮援靈輻撤房帷兮席庭筵舉醑觴兮

告永遷悽切兮增歛俯仰兮揮淚想孤魂兮眷
舊宇視倏忽兮若髣髴徒髣髴兮在慮靡耳目
兮一遇停駕兮淹留徘徊兮故處周求兮何獲
引身兮當去去華輦兮初邁馬迴首兮旋旆風
泠泠兮入帷雲霏霏兮承蓋鳥俛翼兮忘林魚
仰沫兮失瀨悵悵兮遲遲遵吉路兮凶歸思其
人兮已滅覽餘跡兮未夷昔同塗兮今異世憶
舊歡兮增新悲謂原隰兮無畔謂川流兮無岸
望山兮寥廓臨水兮浩汗視天日兮蒼茫面色

里兮蕭散，匪外物兮或改。固歡哀兮情換，嗟潛
隧兮旣敞。將送形兮長往，委蘭房兮繁華。襲窮
泉兮朽壤，中慕叫兮擗標。之子降兮宅兆，撫靈
櫬兮訣幽房。棺冥冥兮挺窈窕，戶闔兮燈滅。夜
何時兮復曉，歸反哭兮殯宮。聲有止兮哀無終，
是乎非乎何遑趣。一遇兮目中，旣遇目兮無兆。
曾寤寐兮弗夢，旣顧瞻兮家道長。寄心兮爾躬，
重曰已矣。此蓋新京之情然耳，渠懷之其幾何。
庶無愧兮莊子。

爲楊長文作弟仲武哀祝文

悠悠上天，我獨何辜。祖考早世，昆弟幼孤。備嘗
艱毒，同集蓼荼。父兮生我，過庭靡聞。母兮鞠我，
寧一苦辛。日顧日復，我弟我身。竝自垂髮，越于
成人。濟哲聰朗，純粹溫良。烈烈清風，邦族之望。
母氏劬勞，庶爾之報。彼蒼者天，子何不弔。殲我
令弟，窮泉是造。無父何怙，無弟何友。煢煢此身，
哀哀慈母。煩冤痛毒，撫心思咎。哀爾薄祐，逢家
多阻。弱冠未室，盛年絕緒。喪庭寥廓，廬位無主。

真冥長夜，窈窈玄宇，當復何時，見我仲武，于以
祔之，于其王父，魂而有靈，神其寧處。

京陵公主女王氏哀辭

猗歟公子，季女惟王，生自洪胄，稟茲義方，盼倩
粲麗，窈窕淑良，如彼春蘭，吐葩含芳，葩以霜隕，
芳以歇盡，彼蒼者天，胡寧斯忍，曾未弱笄，無疾
而隕，官朝震驚，靡人不愍，嗟爾母氏，劬勞撫鞠，
恩斯勤斯，是長是育，帷屏媚子，奄離顧復，哀無
廢心，涕不輟目，于以祖之，于掖庭閨，于以送之。

陵岡崔嵬，僕馬迴眷，旗旒旋飛，夕陽失映，晴鳥
忘歸，皎皎霄月，載盈載微，冥冥公子，一往不追，
長夜無旦，孤魂曷依。

陽城劉氏妹哀辭

鳥鳴于柏，鳥號于荆，徘徊躑躅，立聞其聲，相彼
羽族，矧伊人情，叩心長叫，痛我同生，誕育聖善，
發奇稚齒，如彼名駒，昂昂千里，劉氏懷寶，未曜
隋和，伊予輕弱，弗克負荷，祿微于朝，貯匱于家，
俾我令妹，勤儉備加，珍羞罕御，器服靡華，撫膺

恨毒逝矣柰何哀哀母氏蒸蒸聖志震動擗標
何痛如之魂而有靈豈不慕思嗟哉往矣當復
何時

金鹿哀辭

嗟我金鹿天姿特挺鬢髮凝膚蛾眉嶸領柔情
和泰朗心聰警嗚呼上天胡忍我門良嬪短世
令子天昏旣披我幹又剪我根塊如癩木枯荻
獨存捐子中野遵我歸路將反如疑迴首長顧

傷弱子辭

予之長安次于新安千秋亭而弱子夭感羸博
之哀乃傷之曰

柰何兮弱子邈棄爾兮丘林還眺兮墳瘞草莽
莽兮木森森伊邃世之遐胄逮祖考之永延咨
吾家之不嗣羌一適之未甄仰崇堂之遺構若
無津而涉川葉落永離覆水不收赤子何辜罪
我之由

悲邢生辭

周文王之苗裔予元舅之洪胄厲操確其不拔

鄉譽著而且就，妙邦畿而高察。雄州閭以擢秀，茂實暢矣而休名未衍。其財至貧，其位至賤，而死之日，奔者盈庭，停予車而在郊，撫靈櫬以增悲。瞻轎容而想像，曾無覲乎餘輝。送子兮境垂，永訣兮路岐。一別兮長絕，盡哀兮告離。

爲任子咸妻作孤女澤蘭哀辭

澤蘭者，任子咸之女也。涉三齡，未沒衰而殞。余聞而悲之，遂爲其母辭。

茫茫造化，爰啓英淑。猗猗澤蘭，應靈誕育。鬢髮蛾眉，巧笑美目。顏耀榮苕，華茂時藝。如金之精，如蘭之馨。淑質彌暢，聰慧日新。朝夕顧復，夙夜盡勤。彼蒼者天，哀此矜人。胡寧不惠，忍予眇身。俾爾嬰孺，微命弗振。俯覽衾襚，仰訴穹旻。弱子在懷，旣生不遂。存靡託躬，沒無遺類。耳存遺響，目想餘顏。寢席伏枕，摧心割肝。相彼烏矣，和鳴嚶嚶。矧伊蘭子，音影冥冥。彷徨丘隴，徒倚墳塋。

祭文

吊孟嘗君文

人罔貴賤，士無真僞。延入如歸，望賓若企。出握秦機，入專齊政。右盼而羸強，左顧而田競。且以造化爲水，天地爲舟。樂則齊喜，哀則同憂。豈區區之國，而大邦是謀。瑣瑣之身，而名利是求。畏首畏尾，東奔西囚。志撓於木偶，命懸於狐裘。

爲諸婦祭庾新婦文

潛形幽櫬，寧神舊宇。室虛風生，牀塵帷舉。自我

潘黃門集 卷全
不見載離寒暑雖則乖隔哀亦時敘啓殯今夕
祖行明朝雨絕華庭埃滅大宵儷執箕箒偕奉
夕朝髣髴未行顧瞻弗獲伏膺飲淚感今懷昔
懷昔伊何祁祁娣姒感今伊何冥冥吾子形未
廢目音猶在耳

哭弟文

視不見兮聽不聞逝日遠兮憂彌殷終皓首兮
何時忘情楚惻兮常苦辛

誄

世祖武皇帝誄

粵若稽古帝皇誕受休命作我晉室赫赫文皇
配天竝日大行龍飛創制改物沉恩汪濊流澤
洋溢上齊七政下綏萬邦四門穆穆五典克從
惟清緝熙於變時雍愛盡事親教加百姓于喪
過哀在祭餘敬后蠶冕服躬籍粢盛六代畢奏
九功咸詠行敦醇樸思貫玄妙蒞政端位臨朝
光曜胄子入學辟雍宗禮國老恂恂貴遊濟濟

莫孝匪子，莫悌匪弟。化自外明，訓法以禮。獷彼
吳楚，稱亂三代。世歷五僞，年幾百載。邊垂虔劉，
王化阻閔。羽檄星馳，鉦鼓日戒。帝御群帥，奉辭
奪旅。腹心庭爭，爪牙疑沮。天監獨照，聖策乃舉。
朝服濟江，止戈曜武。野無交兵，役不淹月。僭號
歸命，稽顙晉闕。邪界蠻流，徬納百越。表閭旌善，
德音爰發。虞人獻箴，周書垂誥。酒懼其彝，獸戒
其冒。於我大行，縱心所好。動不踰矩，性與道奧。
厭厭酣飲，樂不辨顏。桓桓振旅，田無遊盤。我德

如風，民應如蘭。靡不夙夜，無敢宴安。務農望歲，
時或不稔。小心翼翼，恤民以甚。御坐不怡，撤膳
賑廩。西流垂精，南金抑施。永言孝思，天經地義。
問誰贊事，英彥髦士。問誰翼侍，博物君子。潛明
神鑒，從衆屈已。道濟群生，爲而不恃。先天弗違，
後天降時。萬物熙熙，懷而慕慕。思顯顯縉紳，不
謀同辭。巖巖岱宗，想望翠旗。恭惟大行，功成不
居。議寢封禪，心棲冲虛。策告不足，大平有餘。七
十二君，方之茂如。思樂天德，等壽嵩華。如何寢

疾背世登遐，遷幸梓宮。孤我邦家，龜筮旣襲。吉日惟良，永指太極。寧神峻陽，群后擗躄。長訣輻輳，聖靈斯顧。豈伊不傷，家無遠邇。邦靡小大，四海供職。同軌畢會，茫茫原野。亭亭素蓋，縞輅解駕。白虎弭旆，龍輶即定。玄闈載扃，如天斯崩。如地斯傾，哀哀庶寮。煢煢自愍，彼蒼者天。胡寧斯忍，聖君不返。我獨旋軫。

太宰魯武公誄

昂昂公侯，實天誕育。八元斯九，五臣茲六。揜討

逆節，折衝江湖。走欽擒儉，臬誕弊吳。公于出征，爰整其旅。壘未越郊，麾不及舉。秦涼獲乂，西戎即敘。他人之賢，譬彼丘陵。邈矣公侯，如日之昇。泰山其頽，寢疾不興。遐邇曷仰，社稷焉憑。生則榮易，終哀實難。靡不春華，鮮克歲寒。於呼公隕，率土含酸。趙喪望諸，列國同傷。秦亡蹇叔，春者不相。桃李不言，下自成行。德之休明，沒能彌彰。

楊荊州誄

有序

維咸寧元年夏四月乙丑，晉故折衝將軍荊州

清獻公集 卷之五
刺史東武戴侯滎陽楊使君薨嗚呼哀哉夫天子建國諸侯立家選賢與能政是以和周賴尚父殷憑太阿矯矯楊侯晉之爪牙忠節克明茂績維嘉將宏王畧肅清荒遐降年不永玄首未華銜恨沒世命也奈何嗚呼哀哉自古在昔有生必死身沒名垂先哲所躋行以號彰德以述美敢託旒旗爰作斯誄其辭曰

邈矣遠祖系自有周昭穆繁昌枝庶分流族始伯喬氏出楊侯奕世不顯允迪大猷天厭漢德

龍戰未分伊君祖考方事之殷鳥則擇木臣亦簡君投心外朝策名委身奮躍淵塗跨騰風雲或統驍騎或據領軍篤生戴侯茂德繼期纂戎洪緒克構堂基弱冠味道無兢惟時孝實蒸蒸友亦怡怡多才豐藝彊記洽聞目睇毫末心筭無垠草隸兼善尺牘必珍足不輟行手不釋文翰動若飛紙落如雲學優則仕乃從王政散璞發輝臨軹作令化行邑里惠洽百姓越登司官肅我朝命惟此大理國之憲章君蒞其任視民

如傷庶獄明慎刑辟端詳聽參臯呂稱侔于張
改授農政于彼野王倉盈庾億國富兵彊煌煌
文后鴻漸晉室君以兼資參戎作弼用錫土宇
膺茲顯秩青社白茅赤朱其紱魏氏順天聖皇
受終烈烈楊侯實統禁戎司管閭闔清我帝宮
苛慝不作穆如和風謂督勲勞班命彌崇茫茫
海岱玄化未周滔滔江漢疆場分流秉文兼武
時惟楊侯旣守東莞乃牧荊州折衝萬里對楊
王休聞善若驚疾惡如讐示威示德以伐以柔

矣夷凶侈僞師畏逼將乘讐釁席卷南極繼蹇
糧盡神謀不忒君子之過引曲推直如彼日月
有時則食負執其咎功讓其力亦旣旋旆爲法
受黜退守丘塋杜門不出游目典墳縱心儒術
祈祈縉紳升堂入室靡事不咨無疑不質位貶
道行身窮志逸弗慮弗圖乃寢乃疾昊天不弔
景命其卒嗚呼哀哉子囊佐楚遺言城郢史魚
諫衛以尸顯政伊君臨終不忘忠敬寢伏床蓐
念在朝廷朝達其辭夕隕其命聖王嗟悼寵贈

衾襚誄德策勳考終定謚群辟動懷邦族揮淚孤嗣在疚寮屬含悴赴者同哀路人增歎嗚呼哀哉余以頑蔽覆露重陰仰追先考執友之心俯感知已識達之深承諱切怛涕淚霑襟豈忘載奔憂病是沈在疾不省於亡不臨舉聲增慟哀有餘音嗚呼哀哉

夏侯常侍誄

夏侯湛字孝若譙國譙人也少知名弱冠辟太尉府掾賢良方正徵爲太子舍人尚書郎野王

令中書郎南陽相家艱乞還頃之選爲太子僕未就命而世祖崩天子以爲散騎常侍從班列也春秋四十有九元康元年夏五月壬辰寢疾卒於延熹里第嗚呼哀哉乃作誄曰

禹錫玄珪實曰文命克明克聖光啓夏政其在于漢邁勳惟嬰思弘儒業小大雙名顯祖曜德牧兗及荆父守淮岱治亦有聲英英夫子灼灼其儁飛辯摘藻華繁玉振如彼隨和發彩流潤如彼錦纈列素點絢人見其表莫測其裏徒謂

清黃門集 卷全
吾生文勝則史，心照神交，唯我與子。且歷少長，逮觀終始。子之承親，孝齊閔參。子之友悌，和如瑟琴。事君直道，與朋信心。雖實唱高，猶賞爾音。弱冠厲翼，羽儀初升。公弓旣招，皇輿乃徵。內贊兩宮，外宰黎蒸。忠節允著，清風載興。決彼樂都，寵子惟王。設官建輔，竅簡邦良。用取喉舌，相爾南陽。惠訓不倦，視人如傷。乃眷北顧，辭祿延熹。余亦偃息，無事明時。疇昔之游，二紀于茲。班白攜手，何歎如之。居吾語汝，衆實勝寡。人惡雋異。

俗疵文雅，執戟疲楊。長沙投賈，無謂爾高。恥居物下，子乃洗然變色。易容慨然，歎曰：道固不同，爲仁由已。匪我求蒙，誰毀誰譽。何去何從，莫涅匪緇。莫磨匪磷，子獨正色。居屈志申，雖不爾以。猶致其身，獻替盡規。媚茲一人，讜言忠謀。世祖是嘉，將僕儲皇。奉轡承華，先朝末命。聖烈顯加，入侍帝闈。出光厥家。我聞積善，神降之吉。宜享遐紀，長保天秩。如何斯人，而有斯疾。曾未知命，中年隕卒。嗚呼哀哉，惟爾之存。匪爵而貴，其食

潘黃門集 卷全
美服重珍兼味，臨終遺誓，永錫爾類，歛以時襲，殯不簡器，誰能拔俗，生盡其養，孰是養生而薄其葬，淵哉若人，縱心條暢，傑操明達，困而彌亮，柩輅既祖，容體長歸，存亡永訣，逝者不追，望子舊車，覽爾遺衣，悞抑失聲，迸涕交揮，非子爲慟，吾慟爲誰，嗚呼哀哉，日往月來，暑退寒襲，零露霑凝，勁風淒急，慘爾其傷，念我良執，適子素館，撫孤相泣，前思未弭，後感仍集，積悲滿懷，逝矣安及，嗚呼哀哉。

○馬汧督誄

惟元康七年秋九月十五日，晉故督守關中侯扶風馬君卒，嗚呼哀哉！初，雍部之內，屬羌反，未弭而編戶之氏，又肆逆焉。雖王旅致討，終於殄滅，而蜂蠆有毒，驟失小利，俾百姓流亡，類於塗炭，建威喪元於好時，州伯宵遯乎大谿。若夫偏師裨將之隕首覆車者，蓋以十數，剖符專城，紆青拖墨之司，奔走失其守者，相望於境。秦隴之僭，鞏更爲魁，旣已襲汧，而館其縣子，以耿爾之

身介乎重圍之裏。率寡弱之衆。據十雉之城。羣
氏如蝟毛而起。四面雨射城中。城中鑿穴而處。
負戶而汲。木石將盡。樵蘇乏竭。芻蕘罄絕。於是
乎發梁棟而用之。芻以鐵鑱機。關旣縱礪而又
升焉。爨陳焦之麥。柿栲栳之松。用能薪芻不匱。
人畜取給。青煙傍起。櫪馬長鳴。凶醜駭而疑懼。
乃闕地而攻。子命穴浚。塹寘壺。鑄瓶甌以偵之。
將穿城響作。因焚穢火。薰之。潛氏殲焉。久之。安
西之救至。竟免虎口之厄。全數百萬石之積。文

契書於幕府。聖朝疇咨。進以顯秩。殊以幢蓋之
制。而州之有司。乃以私隸數口。穀數十斛。考訊
吏兵。以檟楚之。辭連之。大將軍屢抗。其疏曰。敦
固守孤城。獨當羣寇。以少禦衆。載離寒暑。臨危
奮節。保穀全城。而雍州從事。忌敦勲效。極推小
疵。非所以褒獎元功。宜解敦禁劾。假授詔書。遽
許而子固以下獄。發憤而卒也。朝廷聞而傷之。
策書曰。皇帝咨故督守關中侯馬敦。忠勇果毅。
率屬有方。固守孤城。危逼獲濟。寵秩未加。不幸

潘黃門集 卷之三
喪亡、朕用悼焉。今追贈牙門將軍印綬，祠以少牢，魂而有靈，嘉茲寵榮。然潔士之聞穢，其庸致思乎？若乃下吏之肆其噤害，則皆妬之徒也。嗟乎！妬之欺善，抑亦買首之讐也。語曰：或戒其子，慎無爲善。言固可以若是。悲夫！昔乘丘之戰，縣賁父御魯莊公馬，驚敗績。賁父曰：他日未嘗敗績，而今敗績，是無勇也。遂死之。圍人浴馬，有流矢在白肉，公曰：非其罪也。乃誅之。漢明帝時有司馬叔持者，白日於都市手劒父讐，視死如歸。

亦命史臣班固爲之誄。然則忠孝義烈之流，慷慨非命而死者，綴辭之士，未之或遺也。天子旣已策而贈之，微臣託乎舊史之末，敢闕其文哉。乃作誄曰：

知人未易，人未易知。嗟茲馬生，位末名卑。西戎猾夏，乃奮其奇。保此汧城，救我邊危。彼邊奚危，城小粟富。子以眇身而裁其守，兵無加衛，墉不增築。婪婪群狄，豺虎競逐。鞏更恣睢，潛踣官寺。齊萬虓闕，震驚台司。聲勢沸騰，種落煽熾。旌旗

電舒戈矛林植彤珠星流飛矢雨集惴惴士女
號天以泣爨麥而炊負戶以汲累卵之危倒懸
之急馬生爰發在險彌亮精貫白日猛烈秋霜
稜威可厲懦夫克壯霑恩撫循寒士挾纊蠢蠢
犬羊阻衆陵寡潛隧密攻九地之下慙慙窮城
氣若無假昔命懸天今也惟馬惟此馬生才博
智贍偵以瓶壺刷以長壟鋪未見鋒火以起焰
薰尸滿窟培穴以斂木石匱竭其稈空虛矚然
馬生傲若有餘芻梁爲礪柿松爲芻守不乏械

櫪有鳴駒哀哀建威身伏斧質悠悠烈將覆車
喪器戎釋我徒顯誅我帥以生易死疇克不二
聖朝西顧關右震惶分我汧庾化爲寇糧實賴
夫子思暮彌長咸使有勇致命知方我雖未學
聞之前典十世宥能表墓旌善思人愛樹甘棠
勿翦矧乃君子功深疑淺兩造未具儲隸蓋鮮
孰是勲庸而不獲免猾哉部司其心反側斷善
害能醜正惡直牧人透迤自公退食聞穢鷹揚
曾不戢翼忘爾大勞猜爾小利苟莫開懷于何

不至，慨慨馬生，硜硜高致，發憤囹圄，沒而猶眠。
嗚呼哀哉！安平出奇，破齊克完，張孟運籌，危趙
獲安，汧人賴子，猶彼談單，如何吝嫉，搖之筆端。
傾倉可賞，矧云私粟，狄隸可頒，况曰家僕，剔子
雙龜，貫以三木，功存汧城，身死汧獄，凡爾同圍，
心焉摧剝，扶老携幼，街號巷哭，嗚呼哀哉！明明
天子，旌以殊恩，光光寵贈，乃牙其門，司勳班爵，
亦兆後昆，死而有靈，庶慰冤寃，嗚呼哀哉！

楊仲武誄

楊經字仲武，滎陽宛陵人也。中領軍肅侯之曾
孫，荊州刺史戴侯之孫，東武康侯之子也。八歲
喪父，其母鄭氏，光祿勳密陵成侯之元女，操行
甚高，恤養幼孤，以保父夫家，而免諸艱難。戴侯
康侯多所論著，又善草隸之藝，子以妙年之秀，
固能綜覽義旨，而軌式模範矣。雖舅氏隆盛，而
孤貧守約，心安陋巷，體服菲薄，余甚奇之。若乃
清才雋茂，盛德日新，吾見其進，未見其已也。既
藉三葉世親之恩，而子之姑，予之伉儷焉。往歲

卒於德宮里，喪服周次，綢繆累月，苟人必有心，此亦款誠之至也。不幸短命，春秋二十九。元康九年夏五月己亥卒，嗚呼哀哉。乃作詩曰：

伊子之先，奕葉熙隆。惟祖惟曾，載揚休風。顯考康侯，無祿早終。名器雖光，勲業未融。篤生吾子，誕茂淑姿。克岐克嶷，知章知微。鈞深探賾，味道研幾。匪直也人，邦家之輝。子之遘閔，曾未亂髮。如彼危根，當此衝飈。德之休明，靡幽不喬。弱冠流芳，儁聲清劭。爾舅惟榮，爾宗惟瘁。幼秉殊操

違豐安匱，撰錄先訓。俾無隕墜，舊文新藝。罔不必肄，潘揚之穆。有自來矣，矧乃今日。慎終如始，爾休爾戚。如實在已，視予猶父。不得猶子，敬亦既篤。愛亦既深，雖殊其年，實同厥心。日昃景西，望子朝陰。如何短折，皆世湮沈。嗚呼哀哉，寢疾彌留。守茲孝友，臨命忘身。顧戀慈母，哀哀慈母。痛心疾首，噉噉同生。悽悽諸舅，春蘭擢莖。方茂其華，荆寶挺璞。將剖於和，含芳委曜。毀壁摧柯，嗚呼仲武，痛哉柰何。德宮之艱，同次外寢。惟我

潘黃門集 卷全
與爾對筵接枕。自時迄今。曾未盈稔。姑姪繼隕。
何痛斯甚。嗚呼哀哉。披帙散書。屢覩遺文。有造
有寫。或草或真。執玩周復。想見其人。紙勞于手。
涕霑于巾。龜筮既襲。埏隧既開。痛矣楊子。與世
長乖。朝濟洛川。夕次山隈。歸鳥頡頏。行雲徘徊。
臨穴永訣。撫櫬盡哀。遺形莫紹。增慟余懷。冤兮
往矣。梁木實摧。嗚呼哀哉。

、宜城宣君誄

行成于已。名生于人。考終定謚。實曰宣君。祝宗

蒞事。卿相奉引。輕車整駕。介士列陣。鸞輅依容。
輻車升襯。

庾尚書誄

寬而能懷。威而不猛。化行如形。民應如影。矐矐
虛坐。翩翩玄幕。几席生塵。空館寥廓。

南陽長公主誄

昔唐女嬪媯。書敘釐降之美。周姬適齊。詩詠肅
雍之歌。漢之新野。以節義垂號千載。伊晉之獻
主。以聰明睿智。考終定謚。茲可謂母儀純備。邁

蹤古烈者已，惜乎不永，背世湮沈，爰託素旂，式章徽音。

主之誕育，既纂洪胄，德之休明，亦固天授，思心婉變，淑質純茂，毋儀不忒，內則靡疚，肇自弱笄，有馥其芬，言告言歸，作合於荀，在貴思降，處逸能勤，上虔諸姑，傍接支嬪，內諧閨闈，外和族姻，終溫且惠，淑慎其身，積善餘慶，啓茲名胤，勵以惠肅，誨以柔順，主實體化，不言而信，二子遵式，匪嚴而峻，於穆獻后，奕代熙盛，重作大司，黎牧

火正國之仁姑，家之慈母，天道輔賢，宜享遐壽，如何短命，曾不華首，寢疾弗興，繁榮摧朽，嗚呼哀哉，容車戒路，祖奠在庭，駢驂躊躇，服馬悲鳴，皇輿親臨，望旗失聲，列辟咸起，灑淚霑纓，嗚呼哀哉，既次墓門，降柩升輜，靈衣從風，素幕生塵，明燎守夜，竦紼俟晨，噉噉遺嗣，煢煢孤臣，號無廢音，涕不輟巾。

皇女誄

厥初在鞠，玉盾華繁，玄髮脩曜，蛾眉連娟，清顯

橫流明眸朗鮮，迎時夙智，望歲能言，亦既免懷。
 提携紫庭，聰惠機警，授色應聲，疊疊其進，好曰
 之經，辭令容止，閑於幼齡，猗猗春蘭，柔條含芳，
 落英彫矣，從風飄揚，妙好弱媛，窈窕淑良，孰是
 人斯，而離斯殃，靈殯既祖，次此暴廬，披覽遺物，
 徘徊舊居，手澤未改，領臆如初，孤鳧遐逝，存亡
 永殊，嗚呼哀哉。

賈充誄

年踰知命，位極人臣，家無餘祿，貴而食貧。

詩

關中詩 十六章

元康六年氏賊齊萬年於關中
反亂既平帝命諸臣作關中詩

於皇時晉，受命既固，三祖在天，聖皇紹祚，德博
 化光，刑簡枉錯，微火不戒，延我寶庫，
 蠢爾戎狄，狡焉思肆，虞我國青，窺我利器，嶽牧
 慮殊，威懷理二，將無專策，兵不素肄，
 翹翹趙王，請徒三萬，朝議惟疑，未逞斯願，桓桓
 梁征，高牙乃建，旗蓋相望，偏師作援，

虎視眈眈，威彼好時。素甲日耀，玄幕雲起。誰其繼之？夏侯卿士。惟系惟處，別營碁時。夫豈無謀？戎士承平。守有完郛，戰無全兵。鋒交卒奔，孰免孟明。飛檄秦郊，告敗上京。周殉師令，身膏氏斧。人之云亡，貞節克舉。盧播違命，投畀朔土。爲法受惡，誰謂荼苦。哀此黎元，無罪無辜。肝腦塗地，白骨交衢。夫行妻寡，父出子孤。俾我晉民，化爲狄俘。亂離斯瘼，日月其稔。天子是矜，盱食宴寢。王憂

臣勞，孰不祇懍。愧無獻納，尸素以甚。皇赫斯怒，爰整精銳。命彼上谷，指日遙逝。親奉成規，稜威遐厲。首陷中亭，揚聲萬計。兵固詭道，先聲後實。聞之有司，以萬爲一。紂之不善，我未之必。虛鼎滄德，繆彰甲吉。雍門不啓，陳汧危偪。觀遂虎奮，感恩輸力。重圍克解，危城載色。豈曰無過，功亦不測。情固萬端，于何不有。紛紜齊萬，亦孔之醜。曰納其降，曰梟其首。疇真可掩，孰僞可久。

既徵爾辭，既蔽爾訟。當乃明實，否則證空。好爵
既縻，顯戮亦從。不見竇林，伏尸漢邦。
周人之詩，寔曰采薇。北難獫狁，西患昆夷。以古
況今，何足曜威。徒愍斯民，我心傷悲。
斯民如何，荼毒于秦。師旅既加，饑饉是因。疫癘
淫行，荆棘成榛。絳陽之粟，浮于渭濱。
明明天子，視民如傷。申命羣司，保爾封疆。靡暴
于衆，無陵于疆。惓惓寡弱，如熙春陽。

爲賈謐作贈陸機

十一章

肇自初創，二儀絪縕。粵有生民，伏羲始君。結繩
闡化，八象成文。芒芒九有，區域以分。
神農更王，軒轅承紀。畫野離疆，爰封衆子。夏殷
既襲，宗周繼祀。綿綿瓜瓞，六國互峙。
彊秦兼并，吞滅四隅。子嬰面覩，漢祖膺圖。靈獻
微弱，在涅則渝。三雄鼎足，孫啓南吳。
南吳伊何，僭號稱王。大晉統天，仁風遐揚。僞孫
銜璧，奉土歸疆。婉婉長離，凌江而翔。
長離云誰，咨爾陸生。鶴鳴九臯，猶載厥聲。况乃

海隅播名上京爰應旌招撫翼宰庭
儲皇之選實簡惟良英英朱鸞來自南岡曜藻
崇正玄冕丹裳如彼蘭蕙載採其芳
潘岳作鎮輔我京室旋反桑梓帝弟作弼或云
國宦清塗攸失吾子洗然恬淡自逸
廊廟惟清俊又是延擢應嘉舉自國而遷齊轡
羣龍光讚納言優游省闈珥筆華軒
昔余與子繾綣東朝雖禮以賓情通友僚嬉娛
絲竹撫鞞舞韶修日朗月攜手逍遙

自我離羣二周于今雖簡其面分著情深予其
超矣實慰我心發言爲詩俟望好音
欲崇其高必重其層立德之柄莫匪安恒在南
稱甘度北則橙崇子鋒穎不頽不崩

北芒送別王世胄

朱鑣旣揚四轡旣整駕言餞行告離芒嶺情有
遷延日無餘影迴轅南翔心焉北騁

家風詩

縮髮縮髮髮亦鬢止日祇日祇敬亦慎止靡專

靡有受之父母鳴鶴匪和析薪弗荷隱憂孔疚
我堂靡構義方既訓家道頽頽豈敢荒寧一日
三省

於賈謐坐講漢書

治道在儒弘儒由人顯允曾侯文質彬彬筆下
摘藻席上敷珍前疑惟辨舊史惟新惟新爾史
既辨爾疑延我寮友講此微辭

離合

佃漁始化人民穴處意守醇樸音應律呂桑梓

被源卉木在野錫鸞未設金石拂舉害咎蠲消
吉德流普谿谷可安奚作棟宇嫣然以憇焉懼
外侮熙神委命已求多祐嘆彼季末口出擇語
誰能默識言喪厥所董畝之諺龍潛巖阻勘義
崇亂少長失敘

金谷集作詩

王生和鼎實石子鎮海沂親友各言邁中心悵
有違何以敘離思携手游郊畿朝發晉京陽夕
次金谷溜廻谿縈曲阻峻阪路威夷綠池泛淡

淡青柳何依依，濫泉龍鱗瀾。一作濶激波連珠揮，

前庭樹沙棠，後園植烏桺。靈囿繁石善作若榴，茂

林列芳梨，飲至臨華沼。遷坐登隆坻，玄醴染朱

顏。但愬杯行遲，揚桴撫靈鼓。簫管清且悲，春縈

誰不慕。五臣作耀歲寒良獨希，投分寄石友。白首同

所歸。

河陽縣作二首

微身輕蟬翼，弱冠忝嘉招。在疚妨賢路，再升上

宰朝。猥荷公叔舉，連陪廁王寮。長嘯歸東山，擁

耒耨時苗，幽谷茂織葛。峻巖敷榮條，落英隕林

趾。飛莖秀陵喬，卑高亦何常。升降在一朝，徒恨

良時泰。小人道遂消，譬如野田蓬。幹流隨風飄，

昔倦都邑游，今掌河朔徭。登城眷南顧，凱風揚

微綃。洪流何浩蕩，修芒鬱岿崑。誰謂晉京遠，室

邇身實遼。誰謂邑宰輕，令名患不劭。人生天地

間，百年孰能要。歛如敲石火，譬若截道颺。齊都

無遺聲，桐鄉有餘謚。福謙在純約，害盈由矜驕。

雖無君人德，視民庶不忼。

日夕陰雲起，登城望洪河。川氣冒山嶺，驚湍激巖阿。歸鴈暎蘭時，五臣作詩游魚動圓波。鳴蟬厲寒音，時菊耀秋華。引領望京室，南路在伐柯。大厦五臣作夏緬無覲，崇芒鬱嵯峨。總總都邑人，擾擾俗化訛。依水類浮萍，寄松似懸蘿。朱博糾舒慢，楚風被琅邪。曲蓬何以直，託身以叢麻。黔黎竟何常，政成在民和。位同單父邑，愧無子賤歌。豈敢陋微官，但恐忝所荷。

在懷縣作二首

南陸迎修景，朱明送末垂。初伏啓新節，隆暑方赫曦。朝想慶雲興，夕遲白日移。揮汗辭中宇，登城臨清池。涼飈自遠集，輕襟隨風吹。靈囿耀華果，通衢列高椅。瓜瓞蔓長苞，薑芋紛廣畦。稻栽肅芊芊，黍苗何離離。虛薄乏時用，位微名日卑。驅役宰兩邑，政績竟無施。自我違京輦，四載迄于斯。器非廊廟姿，屢出固其宜。徒懷越鳥志，眷戀想南枝。

春秋代遷逝，四運紛可喜。寵辱易不驚，戀本難

爲思我來冰未泮時暑忽隆熾感此還期淹歎
彼年往駛登城望郊甸游目歷朝寺小國暴民
務終日寂無事白水過庭激綠槐夾門植信美
非吾土祇攪懷歸志眷然顧鞏洛山川邈離異
願言旋舊鄉畏此簡書忌祇奉社稷守恪居處
職司

內顧詩二首

靜居懷所歡登城望四澤春草鬱青青桑柘何
奕奕芳林振朱榮淶水激素石初征冰未泮忽

焉軫絺綌漫漫三千里迢迢遠行客馳情戀朱
顏寸陰過盈尺夜愁極清晨朝悲終日夕山川
信悠永願言良弗獲引領訊歸期沈思不可釋
獨悲安所慕人生若朝露綿邈寄絕域眷戀想
平素爾情旣來追我心亦還顧形體隔不達精
爽交中路不見山下松隆冬不易故不見澗邊
栢歲寒守一度無謂希見疎在遠分彌固

悼亡詩三首

荏苒冬春謝寒暑忽流易之子歸窮泉重壤永

幽隔私懷誰克從。淹留亦何益。僂俛恭朝命。迴心反初役。望廬思其人。入室想所歷。帟屏無髣髴。翰墨有餘跡。流芳未及歇。遺挂猶在壁。悵恍如或存。周遑忡驚惕。如彼翰林鳥。雙栖一朝隻。如彼游川魚。比日中路析。春風緣隙來。晨雷承簷滴。寢息何時忘。沉憂日盈積。庶幾有時衰。莊正猶可擊。

皎皎窻中月。照我室南端。清商應秋至。溽暑隨節闌。凜凜涼風升。始覺夏衾單。豈曰無重纊。誰與同歲寒。歲寒無與同。朗月何朧朧。展轉盼枕席。長簾竟牀空。牀空委清塵。室虛來悲風。獨無李氏靈。髣髴覩爾容。撫衿長歎息。不覺涕霑胸。霑胸安能已。悲懷從中起。寢興目存形。遺音猶在耳。上慚東門吳。下愧蒙莊子。賦詩欲言志。此志難具紀。命也可奈何。長戚自令鄙。

曜靈運天機。四節代遷逝。淒淒朝露凝。烈烈夕風厲。奈何悼淑儷。儀容永潛翳。念此如昨日。誰知已卒歲。改服從朝政。哀心寄私制。茵幃張故

房。朔望臨爾祭。爾祭詎幾時。朔望忽復盡。衾裳一毀撤。千載不復引。瘞瘞基月周。戚戚彌相愍。悲懷感物來。泣涕應情隕。駕言陟東阜。望墳思紆軫。徘徊墟墓間。欲去復不忍。徘徊不忍去。徒倚步踟躕。落葉委埏側。枯荻帶墳隅。孤魂獨煢煢。安知靈與無。投心遵朝命。揮涕強就車。誰謂帝宮遠。路極悲有餘。

哀詩

漼○如○葉○落○樹○邈○若○雨○絕○天○雨○絕○有○歸○雲○葉○落○何

時連山氣冒岡嶺。長風鼓松柏。堂虛聞鳥聲。室暗如日夕。晝愁奄逮昏。夜思忽終昔。展轉獨悲窮。泣下沾枕席。人居天地間。飄若遠行客。先後詎能幾。誰能弊金石。

思子詩

造化甄品物。天地代虛盈。奈何念稚子。懷竒隕幼齡。追想存髣髴。感道傷中情。一往何時還。千載不復生。

別詩

堪為成都王軍司馬
岳送至非邨別作詩

微微髮膚受之父母。峩峩王侯中外之首。子親
伊姑我父唯舅。

閣柱謠

閣東有大牛。王濟鞅裴楷鞅。和嶠刺促不得休。

世說作和嶠鞅裴楷鞅
王濟剔鬪不得休云

本傳

潘岳字安仁。滎陽中牟人也。祖瑾安平太守。父
芘琅邪內史。岳少以才穎見稱。鄉邑號為奇童。
謂終賈之儔也。早辟司空太尉府。舉秀才。太始
中。武帝躬耕籍田。岳作賦以美其事。岳才名冠
世。為眾所疾。遂栖遲十年。出為河陽令。負其才。
而鬱鬱不得志。時尚書僕射山濤領吏部。王濟
裴楷等竝為帝所親遇。岳內非之。題閣道為謠。
後轉懷令。時以逆旅逐末廢農。奸淫亡命。多所

依湊敗亂法度，勅當除之。十里一官攤，使老小貧戶守之。又差吏掌主，依客舍收錢。岳上其議，朝廷從之。岳頻宰二邑，勤于政績，調補尚書度支郎，遷廷尉平，以公事免。楊駿輔政，高選吏佐，引岳爲太傅主簿，駿誅除名。初，譙人公孫宏少孤，貧客田于河陽，善鼓琴，頗屬文。岳之爲河陽令，愛其才藝，待之甚厚。至是，宏爲楚王瑋長史，專殺生之政，時駿綱紀皆當從坐，同署主簿朱振已就戮。岳其夕取急在外，宏言之瑋，謂之假。

吏故得免。未幾，選爲長安令，作西征賦，述所經人物山水，文清旨詣，辭多不錄，徵補博士，未召。以母疾輒去官免，尋爲著作郎，轉散騎侍郎，遷給事黃門侍郎。岳性輕躁，趨世利，與石崇等諂事賈謐，每候其出，與崇輒望塵而拜，搆愍懷之文。岳之辭也，謐二十四友，岳爲其首。謐晉書限斷，亦岳之詞也。其母數誚之曰：爾當知足而乾，沒不已乎？而岳終不能改。旣仕宦不達，乃作閑居賦。初，芑爲琅邪內史，孫秀爲小史，給岳而狡。

黠自喜。岳惡其爲人數撻辱之。秀常銜忿。及趙王倫輔政。秀爲中書令。岳于省內謂秀曰。孫令猶憶疇昔周旋。不答曰。中心藏之。何日亡之。岳于是自知不免。俄而秀遂誣岳及石崇。歐陽建謀奉淮南王允齊王罔爲亂。誅之。夷三族。岳將詣市。與母別曰。負阿母。初被收。俱不相知。石崇已送在市。岳後至。崇謂之曰。安仁。卿亦復爾邪。岳曰。可謂白首同所歸。岳金谷詩云。投分寄石友。白首同所歸。乃成其讖。岳母及兄侍御史釋

弟燕令豹。司徒掾據。據弟詵。兄弟之子。已出之。女無長幼。一時被害。唯釋子伯武。逃難得免。而豹女與其母相抱。號呼不可解。會詔原之。岳美姿儀。辭藻絕麗。尤善爲哀誄之文。少時常挾彈出洛陽道。婦人遇之者。皆連手縈繞。投之以果。遂滿車而歸。時張載甚醜。每行。小兒以瓦石擲之。委頓而反。

史臣曰。安仁思緒雲鶩。詞鋒景煥。前史儔於賈誼。先達方之士衡。賈論政範。源王化之幽贖。潘

著哀詞貫人靈之情性機文喻海韞蓬山而育
蕪。岳藻如江濯美錦而增絢混三家以通校爲
二賢之亞匹矣。然其挾彈盈果拜塵趨貴。蔑棄
倚門之訓。乾沒不逞之間。斯才也。而有斯行也。
天之所賦。何其駁歟。

贊曰岳實含章藻思抑揚趨權冒勢終亦罹殃。
晉潘黃門集終